

釋淨土羣疑論卷第五

西都千福寺大德懷感撰

問曰佛藏經說云何名惡知識云何名善知識佛告舍利弗言若有比丘教餘比丘汝當念佛念法念僧念戒念施念天如是等唯觀涅槃安穩寂滅唯愛畢竟清淨如是教者名爲邪教名惡知識是人名爲誹謗於我助於外道如是惡人我乃不聽受一飲水以自供

養修行魔教人又言寧成就五逆重罪不成就我見衆生見壽見命見陰入界見等此並爲有所得心作念佛等世尊作此種種訶責卽此經文又言聞空无所得法卽自覺知我先受者皆是邪見於空无所得法无疑无悔深入通達不依一切我見人見我說此人名爲清淨梵行等今旣勸人以有所得心作有相念佛此豈不爲諸佛訶責也釋曰諸佛說

法皆爲逗機。機有深淺大小不同。惑有人法見修差別。故陳法要化彼物機。或呵有讚空。或毀空稱有。或令弃小學大。或令先學小乘。後學大乘。故機有萬途。法成八萬。隨緣化物。難可思議。但如此經所說。其訶有所得心。寧爲五逆之罪。餘有聖教。復言寧起我見。如須彌山不起空見。如芥子許。又如法華經說。不得親近小乘。三藏學者。十輪經說。无力飲池。

河詎能吞大海。不習小乘法。何能學大乘。如是等諸大乘經訶有訶空。讚大讚小。无有定說。並爲逗機。不同。然卽佛有真應。二身學者。有初後兩別。然法身深妙。離有離无。四句並。亾百非俱喪。此卽深學之士。能於第一義諦。心不驚動。然猶住著諸相。不亾分別之心。故此經訶有所得心。令除人法二執。使觀无所得法。修念法身之佛。故此經文言。见无所

名爲念佛。若初學之人。捨邪歸正。發菩提心。願生淨土。於无所得。未解安心。或復觀空言。因果寂滅。遂卽无心。怖罪更起。蓋纏若不爲。其廣說善惡因果淨穢差別。諸佛身相不可思議。何能發彼善心。怖斯罪障。厭茲穢土。欣彼淨方。注想白毫。諦觀諸相。滅除罪累。成彼勝因。故勸觀色身。教斯淺學人也。故賢護經第一說。賢護若比丘比丘尼等。清淨持戒。具

足諸行。如是思惟。隨何方所。卽若西方阿彌陀佛。如是想念。彼佛正覺。今在西方。繫念思惟。觀察不已。了了分明。終獲見彼阿彌陀佛。如是觀色身。向下又有經言。今者阿彌陀如來。應正等覺。具有如是三十二相。八十隨形好。身色光明。如融金聚。如是乃至不念彼如來。亦不得彼如來色。已如是次第得空三昧。善男子。是爲諸佛現前三昧也。又觀佛三昧。

海經云。如來亦有法身十力。四无畏。三解脱諸神通事。如是妙處。非汝凡夫所學境界。但當深心起。隨喜想。起是想。已當復繫念。念佛功德。故知初學之輩。觀彼色身。後學之徒。念法身也。故言如是。次第得空三昧。又樂觀理。佛示以无相之身。求念事身。說以相好之體。當須善會經意。勿生毀讚之心。妙知大聖巧逗根機者。

問曰。十方淨土。无量无边。亦有勸修生。諸佛土。何故今者唯勸往生極樂世界耶。釋曰。此有三釋。一有說。无勸。二有勸。機少。三勸文不具。一有說。无勸者。如涅槃經云。於此西方過四十二恒沙世界外。有妙淨土。名曰无勝。一如西方極樂世界。无有異也。如來捨彼淨土而來生此娑婆世界。教化衆生。若但是淨土。即可願生者。何故釋迦如來不勸生自淨土。

唯勸往生極樂世界耶乃至諸大乘經雖說淨土無勸生文。二有勸機少者如維摩詰遠接妙喜世界安置此土示諸大衆佛勸大衆令生彼國有十四那由佗人發菩提心願生彼國佛記當生卽下言妙喜世界於此國土所應饒益其事訖已還復本處若此淨土合一切衆生悉得生者佛何故除十四那由佗人外如來竟不普勸未來衆生令生妙喜而

言妙喜饒益訖已等言故知無機緣故所以不勸三勸文不具者隨願往生經及藥師經等雖標餘方淨土勸物往生而此經文不周悉何者周悉只如觀經等中勸生西方一顯凡夫二明未來三彰造罪四有十方諸佛舒舌證誠五有多本經文同證依之修學無有疑滯故此西方淨土業易可依行諸經既無前件等文唯有一句兩句勸生之處難可依

據何故捨廣多文句而就小經文耶又經文
勸依了義經不依不了義經三藏法師釋了
不了義經有其四種已於觀經疏中具述其
義也今此淨土之教具有四義了義之經故
可依之以修淨行餘經之文義雖說淨土四
義不具是不了義難可依之修淨業也

問曰諸論中說命終受生唯住捨受何因觀
經言歡喜踊躍自見其身乘金剛臺喜受既

強如何捨命也釋曰有一師釋言穢土受生
无聖迎接唯住捨受心中命終淨土受生聖
衆來迎行者命終之時蒙大聖力慈悲加祐
故喜受位亦得命終諸論多據穢土受生故
作是說不可爲例有說往生淨土亦住捨受
心中命終以捨受心性羸劣故順彼命終喜
受心強不能捨命經言歡喜踊躍等言此是
將命終心也非正命終心也經之與論各據

一義不相妨也

問曰觀經之中說垂終一念十念亦得往生
阿彌陀經說一日七日一心不亂方生淨土
无量壽經說盡形壽一向專念佛方得往生
極樂世界若盡形念佛方往生者卽一日七
日一念十念便是虛談若一念十念等亦得
往生何須復教七日盡形專行念佛也釋曰
一念十念一日七日及與盡形皆得往生極

樂世界並非虛談悉是誠言大聖世尊如語
實語豈有虛假而謬說耶然念佛衆生聞淨
土教有早有晚發心之時有遲有速或命有
長短故經說不同若臨終之日方逢善友教
發心念佛亦得往生雖復清昇只當下輩有
命未盡經日始亡或一日二日乃至經多日
能念佛名一心不亂卽隨其命教令一日等
稱念佛名如其壽命遐長多日不夭還教盡

其壽命。今稱佛名不可命促。斯須令其長時。念佛不可壽終百歲。只令一日稱名。故三本經文俱勸念佛各隨一義。教念有殊。彼此不妨。義无乖反。故觀經對臨終之者。極少一念十念亦得往生。阿彌陀經對經日死人能念佛亦生淨土。无量壽經對長壽不死之者。長修功德最多。或長時長日修念。又此三別卽三品。修上者說形中者說日下者說時。於九品中各多種故。雖並往生。咸无苦惱。花開悟道。早晚不同。經說有殊。由斯意也。

問曰。此娑婆世界有十種勝事。諸餘淨土之所无有。又此方修道一日一夜。勝極樂世界一百年。准此經文於此穢土修道。勝生淨土何爲故。乃勸往生西方。耶釋曰。若如所難一切淨土教門。皆不合說。如上引經所說利益淨土。无故諸淨土教。復慇懃勸令願往生有。

何意也。今此二經對機讚勸不同。讚此住者
令諸菩薩雖居穢土不失自行能多利益。苦
惱衆生大悲行勝讚居穢土也。自有菩薩居
穢土中逢遇惡緣廣造諸罪是以如來勸彼
衆生令生淨土永絕惡緣得免輪轉。故勸菩
薩令生淨土。此兩經意菩薩根性二類不同
如何乃引維摩等經所讚諸菩薩居在穢土
饒益衆生等文。卽言我只於此穢土修道何

須生彼淨土也。雖知於此修道一日當被百
年然以見佛逢善知識希逢惡知識退轉緣
衆故勸往生淨土也。如大集經第二十八日
密分云善男子彼佛世界所有衆生煩惱堅
牢繫縛深重其形醜穢多起憍慢惡口兩舌
遠離實語其實愚癡現智慧相多起慳貪現
捨施相多有諂曲現質直相心多濁亂現清
淨相多有嫉妬現柔軟相樂離別人現和合

相多起邪見現正見相彼國衆生隨女人語故斷絕善根增三惡道善男子汝今願能爲我作使至彼國不乃至云云爾時日密菩薩白佛言世尊我能向彼宣說是咒但於彼土生怖畏想何以故如來向者爲我宣說彼土衆生多諸弊惡猶如生聾生盲生瘖隨女人意世尊若有隨順女人意者當知是人永斷善根佛言善男子汝今不爲現利後利當爲饒益一切衆生但往宣說勿生疑慮善男子汝非彼土維摩詰耶何故生怖復有無量無數菩薩其心悼動至心繫念欲得親近禮拜釋迦如來及諸大衆并欲聽受微妙大典如是大衆皆共同心欲往彼界我爲是輩欲說大事何以故是等大衆其心未定若往彼界或生顛倒近惡知識彼佛告言善男子汝今不應生怖畏想言不定菩薩者卽是初位退

行菩薩名曰不定。以不定故。恐來在此。途遇惡緣。退轉造惡。彼土菩薩暫來至此。娑婆世界猶生怖畏。不敢來此。行者今日未是不退菩薩。而即欲住娑婆世界。修道不願往生西方。甚爲失也。瑜伽論第七十八引深密經云。文殊師利故問佛言。世尊。諸穢土中何事易得。何事難得。諸淨土中何事易得。何事難得。善男子。諸穢土中八事易得。二事難得。何等

名爲八事。易得一者。外道。二者。有苦衆生。三者。種姓家勢興衰差別。四者。行諸惡行。五者。毀犯尸羅。六者。惡趣。七者。下乘。八者。下劣意樂。加行菩薩。何等名爲二事。難得一者。增上意樂。加行菩薩之所遊集。二者。如來出現於世。善男子。諸淨土中。與上相違。當知八事甚爲難得。二事易得。爲是多勸生淨土也。

問曰。淨土中无三惡趣。而有化鳥說法淨土。

无實女人亦有化女說法不釋曰有二釋一
釋言唯有化鳥而无化女何以故以經唯說
有於化鳥无說有諸化女故若有者經文亦
應說又淨土論言女人及根缺二乘種不生
難曰經說淨土變化莊嚴豈能盡也稱讚淨
土經言假使世尊住世百千劫化无数舌說
彼淨土莊嚴之相亦不可盡豈以不說卽言
无也二釋言彼有化女如觀音投記經說觀

世音菩薩化无量女人此豈不是化女者也
鼓音聲王經說阿彌陀佛有父有母爲化下
位示有女人化上位者說无女人不相違也
問曰如弥勒發問經說十念非凡愚念不雜
結使念云何凡愚衆生具足煩惱而能作彼
不雜結使念耶釋曰非凡愚念者豈卽是於
聖人念耶不雜結使念者豈是斷煩惱盡者
念耶此經意者明非凡愚念不是欲說聖人

念也。不雜結使。念者不是欲明斷惑者。念也。但是欲明此十種念。能捨娑婆流轉之處。順生。出世解脫之國。凡愚衆生多樂三界穢土。受生順生死流。增長煩惱諸結。使業今修。十念願生淨土。背生死流。順涅槃路。趣賢聖法。順斷惑門。故言非凡愚念。不雜結使。念如大比丘戒等名。聖所受戒。豈卽凡夫不合受耶。此亦如是類可知也。

問曰。若念阿彌陀佛。得生西方。要假多日。多年。生淨土。亦須勲誠。勉勵。長時。稱念佛名。如其臨死。至誠念佛。亦生淨土者。且人生百歲。樂少憂多。別易會難。歡娛時促。但須馳騁。五欲。放縱六情。秉燭夜遊。連宵聚興。臨終之日。念佛一聲。卽得往生。永超衆苦。何須長時苦行。勲懇四修。不倦三業。靡空同是得越娑婆。何勞長時苦行也。釋曰。此有數意。不可預聞。

淨教弃而不修待至終時方當念佛一卽汝
欲願生淨佛國土推欲避斯苦惱生彼西方
不求无上菩提不行菩薩之行但欲縱情寶
樹恣意珍臺不願早悟无生就此垂終一念
也若爲志佛果證三菩提愍諸有情速證正
覺於此穢土恐退菩提就彼淨土方增修妙
行登不退位救苦衆生方欲无間長時具修
萬行何爲今聞淨法不肯修行更事僞奢廣

行放逸垂臨終日念佛生耶若欲至求无上
大果發菩提心願生淨土所恨流浪生死无
始沈淪聞說西方淨土教法卽須身毛皆豎
猶如拔出悲泣雨淚恨聞此法晚至今生卽
須晝夜精勤一心匪懈寧得聞佛淨教更縱
六情繫日連宵造十惡罪推至終日方念佛
名无慚愧言豈成道理又若垂終念佛長時
稱名功行不殊悟道无別可須任汝此言推

至在後如其念增念念增道功不唐捐罪業
轉微福德漸勝成其上輩速悟无生利益不
同豈得唯修一念且麤衣紗服好食細食一
種葢形並除飢渴爾卽去斯弊服著彼羅紈
不食穢食欲求美膳念佛多少功行不同
便卽弃彼長修就斯促念貪好衣食曾无此
言聞修淨行捨長就短是汝煩惱无慚愧言
魔語鬼語壞亂佛法實无一念願生之心見

他長時專誠苦行故爲此語壞他淨意自損
損他深須覺察又汝今時聞說淨法內无苦
惱外具善緣不肯修行待終念佛臨終念佛
雖亦得生然此輩人萬不一往或善友邂逅
未必相逢或衆苦纏身不遑念佛或偏風不
語不得稱名或狂亂失心豈能注想或忽逢
水火不暇至誠或輒遇豺狼以斯天命或逢
值惡友壞爾信心或飲酒過差昏眠致殞或

軍陣鬪戰，奄爾命終。或迫墜高巖，難修正行。衆多障難，率述難周。无得一向不修，就茲五欲。但言終日一念，即生宜應發精進心。除懈怠，想勵茲三業。策彼六時晝夜，精勤學與時競。一生淨土，永離蓋纏。乃至菩提常无退轉。利益弘廣，宜須用心。

問曰：稱讚淨土經說，生彼速證无上正等菩提。既彼修道百歲當此一日，如何速證无上

大菩提耶？釋曰：計此苦中修道一日，可勝彼百年。然逢惡緣多劫，退轉還復遲也。彼雖百年同此一日，唯進不退得名速證无上菩提也。如人急行多時，停息遠前所遲於此修道一日，勝彼百年。佛不說此速證菩提也。如人緩行中間无停住，速達前所故名速證菩提也。問曰：念佛言少習學不難，臨命終人時極迅也。

速又加苦惱不能多修戒定慧等甚深佛法未終之者於長時中更无苦以逼迫神慮何意不觀空无相願修衆道品廣學一切甚深法門而多勸衆生唯行念佛有何義耶釋曰行者一生修淨土業非獨偏勸唯行念佛然修行之者根有利鈍學有淺深故經分定散兩門入成九品差別利根心靜之者教修有相无相之觀平等甚深法門若鈍根散亂之

徒唯行三福三輩之業匪唯偏勸念佛亦修種種法門如其不能廣行念佛亦生淨土又念佛法門或深或淺通定通散大根少行咸得修行定卽始於凡夫終乎十地行念佛三昧甚深微妙華嚴涅槃文殊般若大集賢護觀佛三昧咸共稱讚不可思議如善財童子於功德雲比丘所請修菩薩之行功德雲比丘唯教念佛三昧之法此卽甚深之法也散

卽一切衆生若行若坐一切時處皆得念佛不妨諸務乃至命終亦成其行又修諸行往生西方雖有聖言經文說少念佛得往生其教極多略申三五曉諸迷者一如阿彌陀經唯說念阿彌陀佛得生西方六方恒河沙諸佛舒舌共證念佛行者並得往生觀經下品上生下品中生下品下生三處經文咸陳唯念阿彌陀佛往生淨土又言念佛衆生攝取

不捨无量壽經又言上中下輩行有淺深皆唯一向專念阿彌陀佛得生極樂又四十八弘誓願中於念佛門別發一願言乃至十念若不生者不取正覺又般舟三昧大集賢護等經教諸衆生七日七夜一心專念阿彌陀佛得見佛已請問佛言衆生行何法得生淨土阿彌陀佛報言欲生我國當念我名莫有休息卽生我國又鼓音聲陀羅尼經亦教衆

生十日十夜念阿彌陀佛得生佛國又華嚴經說念佛三昧必見佛命終之後生佛前見彼臨終勸念佛又示尊像令瞻敬又占察經說若欲往生十方佛國當念彼國佛之名號卽得往生如是等无量大乘經文多說念佛得生淨土今勸念佛非是遮餘所修妙行只是念佛之者多經勸讚若行者坐乃至命終皆得行斯念佛之行將爲穩便故勸行也

問曰生彼淨土未入聖流既是凡夫具衆煩惱如何不起諸不善業若起者卽與本願相違言我土衆生无有不善之名如何會釋也釋曰生彼凡夫雖未得聖果所有不善已不現行然不善不行自有多意或緣聖道已起斷彼隨眠或修聖道方便伏現行或緣闍斯惡境彼不得生或以常遇善緣无由造罪或緣諸勝資令過不生或緣乘佛本願惡不得

起雖有惑種不得現行故稱讚淨土經言諸
妙香華雖令見者身心適悅而不增長有情
貪著又言八功德水能令飲者增益種種殊
勝善根如香積佛飯施作佛事等爲此衆緣
諸惡不起也

問曰經言有四種業一現報業二生報業三
後報業四不定業前三是定業定感報故後
一是不定業或感不感報故又有八種業一

報定時不定業二時定報不定業三時報俱
定業四時報俱不定業第一第三是定業第
二第四是不定業經說五逆是生報業即是
時定報亦定業如何觀經言五逆罪滅得生
西方耶釋曰此四種八種業佛於九部不了
教中爲諸不信業果凡夫密意說言有定報
業於諸大乘了義教中說一切業悉皆不定
如涅槃經第十九卷云耆婆爲阿闍世王說

懺悔法罪得滅。又臣聞佛說修一善心能破百種惡。如以毒藥能害衆生。少善亦爾。能破大惡。又三十一云。善男子。有諸衆生。於業緣中心輕。不信爲度。彼故作如是說。善男子。一切作業有輕有重。輕重二業。復各有二。一決定。二不決定。又言。或有重業。可得作輕。或有輕業。可得作重。有智之人。以智慧力。能令地獄極重之業。現世輕受。愚癡之人。現世輕業。地獄重受。阿闍世王。懺悔罪已。不入地獄。蠶摩羅得阿羅漢。瑜伽論說。未得解脫名。決定業已得解脫名。不定業如是等。諸大乘經論。咸說五逆罪等。皆名不定業。悉得消滅。今觀經既是大乘經典。明念阿彌陀佛五逆罪滅。有何疑也。

問曰。如諸論中。俱引契經。說有黑黑業。白白業。雜業非黑白。无異熟業。黑黑業者。欲界不

善業也。白白業者。色无色界善業也。雜業者。欲界善業也。非黑白无異熟業者。无漏業也。未知今造西方業者。四業之中。何業攝耶。釋曰。有說。四業之中。是白白業。雜業二業。所攝以黑黑業。是於不善。此乃能感三途。豈能招淨土報。无漏之業。不能感報。體雖清淨。非異熟因。唯餘二業。感淨土報。若未得上界定。以欲界心。修西方業者。此用雜業往生西方。若

已伏欲感得上界淨心生西方者。此用白白業。生於淨土也。有說不然。此三種業。並約穢土。欲色二界善惡兩趣。以分其業。非約往生西方論其白白等善業。且雜業是欲界人天之業。能招雜報。雖受樂果。亦招苦報。故欲界中受苦樂果。往生淨土。无有衆苦。一向安樂。寧容雜業爲淨土因。若唯白白業是淨土因者。如未生得四靜慮定。爲因。何業生於西方。

故知淨土正因非前業攝前之四業攝法不盡於理何妨又无色界業有文非四業攝以此准知四業攝業不盡也

問曰又大小乘論引契經說有罪福不動三種業未知三種業中爲用何種業而得往生極樂國也釋曰有說於三業中用福業及不動業生西方也三福卽是福業十六觀若得上界定心卽不動業也有說非三業攝以三

業並據穢土業說不約淨土論也故淨土業非三業也

問曰未知得生西方有幾種勝益勸諸衆生而往生也釋曰按稱讚淨土經觀經及无量壽經四十八弘誓願中略舉三十益何者三十益一受用種種功德莊嚴清淨佛土益二大乘法樂益三親近供養无量壽佛益四遊歷十方供養諸佛益五於諸佛所聞法授記

益六福慧資糧疾圓滿益七速證无上正等
菩提益八諸大士等同一集會益九常无退
轉益十无量行願念念增進益十一鸚鵡舍
利宣揚法音益十二清風動樹如天衆樂益
十三摩尼水流宣說苦空益十四諸樂音聲
奏諸法音益十五四十八弘誓願中永絕三
塗益十六眞金色身益十七形无美醜益十
八具足五通益十九住正定聚益二十无諸

不善益二十一壽命長遠益二十二衣食自
然益二十三唯受衆樂益二十四三十二相
益二十五无有實女人益二十六无有小乘
益二十七離諸八難益二十八得三法忍益
二十九身有光明晝夜常光益三十得那羅
延力益略舉三十之益廣即无量无边是以
勸生西方若在娑婆久流生死唯有三十之
損何曾有彼益耶

問曰彌勒所問經說修十種念方得往生一
於一切衆生常起慈心二於一切衆生不毀
其行若有毀者終不往生三於一切衆生深
起悲心不殘害心四發護法心不惜身命五
於一切法不生誹謗六於忍辱中生決定心
深心清淨不貪利養七發一切種智心日日
常念无有休廢八於一切衆生起尊重心除
憍慢心謙下言說九於世談話不生味著心

近於覺道意深起種種善根因緣十不生慣
鬧散亂之心正念觀佛除去諸想准此經文
十念自別如何乃以十聲稱阿彌陀佛而得
往生豈不錯矣釋曰往生西方行門非一或
有三福或十六觀或九品往生行業各別俱
悉得往生淨土受生彌勒所問經自陳十種
往生之法而亦得生觀經自說下品下生臨
命終時稱佛十念而得往生各是聖教互說

往生淨土法門皆成淨業。何因將彼爲是。斥此言非。但自不解經意。亦乃惑諸學者。譬如入流九品。縣尉微官。或能精熟一經。或爲進士之學。或爲流外勳品。或爲七色出身。或作十年品子。皆得入流。悉爲丞尉。豈限一業。作文林郎業。往生亦復如是。非唯一行。生彼西方。故定散兩門。備在觀經之說。三輩修福。出自无量壽經。唯念佛名。蓋是阿彌陀教。或持

大乘妙典。或復孝養二親。世出世之善根。定非定之二業。止作兩持。身口二善。俱生淨土。豈局一門子。須廣讀衆經。開生正信。何得唯觀一經。卽作司南之論。將餘聖教。並非往生之因。何其惑也。又修因有萬輩。得果有多階。不可限以一因果。元異類者也。

問曰。夫菩薩修行。以利物爲懷。大慈悲心。念念常起。理須身遊惡道。歷三途。愍彼沈淪。皆

命離苦今乃捨此穢方願生淨土自求已樂
不願利人无始有緣父母兄弟六親眷屬朋
友往還皆悉繫關三界牢獄弃而不救絕无
悲愍豈成大士之心方爲菩薩之行今願生
淨土非爲善心莫識所由願陳斯旨釋曰夫
發菩提心修菩薩行要須起大慈悲憐愍含
識廣興濟度拔苦施安然行有淺深根有上
下若深學菩薩大悲增上已得不退不畏已

損唯欲益他並多在穢方廣行利物少生淨
土親承聖尊或淺行菩薩大智增上猶有退
轉雖有悲愍苦惱衆生隨遇惡緣退菩薩行
造衆惡業失菩提心廣如菩薩本業瓔珞經
說法才王子等此卽二利俱失自他並損爲
此願生淨土離彼惡緣親近聖尊恒聞正法
與諸菩薩俱會一處歷事他方散華供養復
聞大乘真淨妙法念念增進无有退轉

二乘闡提外道，頹壞初學，无上道心。雖復拔苦之心，念念不捨自利之行，是利他行。本本若不固末，亦不堅。是以先須願生淨土，長養菩薩菩提根牙，令使堅牢。縱遇惡緣，亦无退轉。方可離斯淨土，還生娑婆。救攝无始沈淪有緣，父母六親眷屬朋友知識法界含靈，此義於安樂集中，禪師已廣引。父母被溺，將漂駛流，一子隨後入水，即救救之，不得遂被

溺死。一子歸舍，備辦船舫，直往深流，救親困厄。此義亦爾。諸有智者，以喻得解也。

問曰：淨土論云：大乘善根界，等无譏嫌名。女人及根缺，二乘種不生。彼界云何得有聲聞而經中說有？无量无边聲聞弟子，皆阿羅漢等。耶釋曰：此有四釋。一釋云：二乘種不生者，依瑜伽師地論說有五乘衆生无始已來法爾成就五乘姓別。一菩薩乘，二緣覺乘，三聲

聞乘四人天乘五不定乘言二乘種不生者
是緣覺乘及人天乘以緣覺乘定受緣覺之
果多生无佛世界不可生於淨土以淨土有
佛又不信有十方淨土人天乘唯是流轉生
死凡夫不可生淨土以淨土衆生皆是當得
无上菩提故二釋前義不然若以二乘種不
生取緣覺乘人天乘者卽聲聞乘得生者何
故言大乘善根界又言非但无三種體亦无

三種名耶今二乘種不生者不論人天乘但
於三乘之中除聲聞緣覺二乘名二乘種不
生也問曰若聲聞緣覺乘種不生者何故彼
國有聲聞耶答言无二乘者无定姓二乘彼
土二乘並是不定姓聲聞悉能迴心入大乘
也天親菩薩依瑜伽師地論造諸論故攝論
云披閱決定藏以釋攝大乘決定藏卽是瑜
伽師地中決擇分也今造淨土論還依彼論

之宗有五乘姓義故言二乘種不生也三依
舊諸德釋此文言聲聞有二種一愚法謂今
生未能迴小向大聲聞二不愚法謂已能迴
小向大聲聞前者名二乘種以不迴心向大
不信有淨土不願生也後名非二乘種雖修
小行以信大乘願生淨土也四釋云彼以迴
心向大所修聖道斷惑皆爲趣无上菩提不
名二乘也以成佛果必定須斷人法二執正

習雙亡證人法二空究竟滿足方得名佛彼
爲先是小乘厭人執煩惱爲此先斷取彼四
果得名阿羅漢亦曰聲聞然非小乘也阿羅
漢名非唯小果以佛亦得名阿羅漢如四分
律云佛度阿若憍陳如已言三千大千世界
有二阿羅漢一是佛二是阿若憍陳如故阿
羅漢名非唯小果之稱聲聞之名亦通大乘
故法華經云我等今者真是聲聞以佛道聲

今一切聞此卽菩薩聲聞也我等今者真同
羅漢於諸世間天人魔梵普於其中應受供
養此卽大乘菩薩名雖與彼小果名同然義
有別今淨土聲聞阿羅漢等悉是趣求无上
菩提之人故非二乘種亦非二乘名也爲已
發大乘心雖名聲聞卽非小乘名也如法華
經說彼阿難迴心向大佛與受記名山海慧
自在通王如來至結集時取阿羅漢豈是退

大乘心趣求小果又維摩經云迦葉言我從
是來不復勸人以聲聞辟支佛行何因結集
之日勸阿難取阿羅漢果故知阿羅漢果非
小乘果也阿難從佛授記後所行之行悉是
趣佛故知卽是大乘菩薩行也然直往之人
先斷法執煩惱修道人執煩惱至全剛心方
頓除卽得成佛從本已來直往菩薩先作意
唯欲斷除法執故留惑至惑盡具佛一切知

以法執煩惱微細難除障三菩提大果望聲聞是白淨无記望菩薩是有覆无記菩薩偏厭故攝論云智障極旨暗謂真俗別執是以偏先斷也人執煩惱障於涅槃聲聞之人深厭生死唯求自利不能修學佛一切智故彼无心斷於法執煩惱法執煩惱不障涅槃故諸聲聞斷人執盡得般涅槃今此聲聞在七方便中或七方便前位中三品人為先求聲

聞深厭人執煩惱以於此惑作意斷除今生西方雖復迴心趣求佛果為先厭人執煩惱還依本習為說四諦令其具斷彼人執煩惱見修兩惑斷彼惑時必須見於四真諦理用无漏聖道斷此煩惱斷見惑名曰預流非住彼道名預流也斷修惑已名阿羅漢如阿羅漢无諸惑故雖有此名只是菩薩之行漸頓兩人俱行菩薩行並趣求佛果雖並得名

薩然迂迴人亦得名聲聞以因聲悟道復本
是小機亦得名菩薩以彼趣求大菩提故菩
薩之人以直往故但名菩薩不名聲聞以本
不是因聲悟道故佛以二名簡彼漸頓二衆
弟子故言无量無邊聲聞弟子皆阿羅漢非
是算數之所能知諸菩薩亦如是也問曰衆
香世界與極樂世界俱是大乘清淨佛土何
因衆香世界無有聲聞辟支佛名唯有清淨

大菩薩衆而極樂世界乃有無量無邊聲聞
弟子此聲聞衆豈非小乘耶釋曰此二佛土
雖俱是彼大乘之界然其聖衆有通有局衆
香世界唯是趣大乘之人於此娑婆修行八
法無瘡疣生彼淨土唯聞頓教大乘故經說
彼唯有清淨大菩薩衆無二乘名也極樂世
界通彼迴小向大聲聞生彼淨土通聞漸頓
二種大乘會二歸一之教發起大心行菩薩

行以先宿習斷入執惑雖行菩薩道然先斷其煩惱障種故得名爲聲聞阿羅漢雖曰聲聞以佛道聲令一切聞也雖曰阿羅漢於諸世間應受供養也故俱並是大乘之界直往迂迴二衆別也

問曰如小乘四決擇分善根中燻不受邪教頂不斷善根忍不生惡趣世第一法以入聖道此卽至於下品忍位方得惡趣非擇滅也

菩薩爲利生不受變易生死猶自未得三惡趣非擇滅也如何一生淨土極惡凡夫一聲十聲稱念佛號卽得永絕三惡趣而不生也釋曰決擇分善根小乘位人居在穢土退轉之處燻頂二善根猶爲退位故至忍善根方得惡趣非擇滅也然薩婆多宗亦許別義於忍位前得惡趣非擇滅然不決定今生西方猶處殊勝常觀聖衆恒聞妙法殊勝行願念

念增進前前惡業漸漸消滅後後善品念念
增修闕彼惡緣故得非擇滅得不退轉以願
力故往諸惡趣拯拔沈淪願力受生不由業
往不落惡趣其義不妨也

釋淨土羣疑論卷第五

校讎

二乘右機有深淺機字現本無 ○ 惑有人法惑字現本或 ○ 但如

此經所說但字現本只 ○ 不習小乘法何能學大乘

現本作不學小乘 ○ 並為逗機不同現本無 ○ 於

法何能習大乘 ○ 如融金聚現本作如 ○ 於

第一義諦現本無 ○ 亦有勸修勸字現 ○ 唯勸

三解脫現本作三 ○ 然以見佛現本作以 ○ 乃至

往生勸字現 ○ 然以見佛然見佛 ○ 乃至

云云云云現本 ○ 生旨生瘧瘧字現 ○ 現利後利

現本後 ○ 經文亦應說現本作 ○ 於聖人

念佛耶現本無 ○ 解脫之國國字現 ○ 就此垂

終一念也現本無 ○ 色无色界善業也現本無

○ 且雜業是乃之業且字現 ○ 以此准知准字

何者三十益現本無 ○ 但自不解經

意現本無 ○ 縣尉微官微官現本 ○ 定非定之

二業止作兩持二字現本作 ○ 繫關三界關字現本

作十八備辨船舫舫字現 ○ 今二乘種不生者

現本無 ○ 為說四諦令其具斷現本無 ○ 但

名菩薩但字現 ○ 但

群經論卷五

三六